

貼婦之錢旋即倒死又迫以私逃遠竄之路
擲公帑殘物命耗軍伍皆由于此應如道臣
議每馬月食料銀五錢除將十九年經制通
融外所少不多量爲議補其後有倒死者照
各邊例朋幫扣買三年之後所省馬價足以
辦此不必仰給京運矣至種馬一節雖有永
寧一監然廣寧錦義之間地當濱海水草肥
澤牧養甚便如得馬價六千兩於山東等處
市牝馬千匹設監司牧兩年之內雲錦成羣

以孳生者爲驛站應付而軍馬之在驛應差
者盡撤歸營則驛馬不缺營馬亦克勝于每
年買馬而不得馬之用此兩利之術也伏候

聖裁

一議襲替軍衛應襲者本處起文赴部驗黃襲
者此舊例也自遼左兵興恐應襲者借赴部
之名爲入關之計棄桑梓不顧雖冠裳而何
補遂議一槩停止慮誠深遠矣職所過之地
各應襲者擁馬相愬有願戮力邊疆借一職

以自效者有願輸粟助餉希霑一命者有陣
亡將吏之子弟國難家仇憤氣雲涌思授職
從戎一當以報者職思將材首重世職多難
正藉勸勤因有事而錮之人無効用之階祇
懷苑結之感宜

勅下遼東撫按凡係應襲者嚴查外黃互相保結
如無假冒情弊免其赴部卽與具題兵部查
對內黃內外符合題准承襲奉行書辦不許
妄爲吹索無端查駁以快要求應襲指揮者

助米二十石輸納遼陽以下遞減少佐軍餉
其係東事以來祖父陣亡者徑准襲替免其
輸助以示優卹中有材智膽力可堪驅策者
經撫二臣卽與隨材拔用則羣心奔悅而敵
愾之氣張矣伏候

聖裁

一議激勸夫人孰不愛其身而願爲君捐孰不
愛其家而願爲國用此尋常之所難且優異
之以風勵海內者也昨者四路徂征戎車再

覆將吏如劉綖以下身當天旂奮臂擊賊肝
腦塗地義無旋踵此

祖宗二百餘年養士之報而忠勇昭然矣北關之
破金白二酋不甘迎馬請降力戰以斃其陣
亡將士上自總鎮下逮偏裨千把再推而生
員吏農挺身從征歿于王事者聽撫按二臣
一一查明禮部從優議卹職意宜將將吏諸
人立廟廣寧春秋致饗使諸吏過之者且感
且泣憤逆胡而思剪將金白二酋立廟鎮靜

堡春秋致饗使外夷聞之者慕中國之有恩
褒忠勸順在此舉也至捐貲助餉在他省直
者固當表章在遼左者尤宜優議查得金州
守備嚴正中輸粟五千石蓋州衛指揮李鑛
輸粟一千石銀一百兩海蓋道中軍王化博
輸馬五十匹復州衛指揮花獻宸助兵一百
二十名輸豆一百石牛車六輛金州衛指揮
福將輸銀二百兩穀豆二百一石七斗撫院
中軍麻承宗輸九輜車一輛七輜車一輛牛

八隻可謂慕義甚殷者其他或千百至十又或助牛助馬助車多寡不等名姓在藉夫不肖者方乘經事之急以要利此獨出庾廩之積以急公有臣如此勸典宜亟在撫按二臣當列名具奏

勅定賞格其志在吞胡者隨酌多寡高下陞除以酬壯志其最少者亦給扁旌異以示勸鄉里使身隕名飛者留英名于萬古財輕義重者被殊寵以千秋將風聽所鼓使人不愛其力而家不私其財東事不足平也其道府諸臣捐俸助餉者並候撫按查明另叙伏乞

聖裁

○閱視邊務吏科給事中姚宗文題爲奉旨訪問事該臣欽奉

勅書內一欵西虜蠢動何以羈縻金白被陷何以招徠後兵部據臣同官張延登揭帖題覆有遼事制勝有機關臣便宜當假一疏覆題臣出關閱視并請發太僕寺銀五萬兩爲羈縻

往來之用奉

聖旨姚宗文着作速出關與經撫諸臣相機行事
北關旣陷其酋長子姓部落何在着于西虜
處訪確憑優恤處置臣竊思之有訪問之事
有訪問之意訪問其子姓招其部落逃匿者
歸之流移者恤之軫少陵之亡簪覓覆巢之
完卵此訪問事也軫亡繼絕固在北關
宣諭疏恩并通西虜如烏羅之愛難割或犬羊之
性可收此訪問之意也此臣奉

旨出關訪之撫臣周永春與道將諸人皆云北關
旣被攻陷金台什力戰以死白羊骨被獲見
殺其子姓部落悉俘虜無可招揀者續據巴
頌夷使孩四伯報稱白羊骨之弟卜兒漢右
赤并金台什之子得力革見在奴酋管內此
方寄命虎穴未可招揀惟得力革二女其長
者名速不他爲西虜腦毛大之孫婦其次名
中根兒爲虎敦兔慙之婦又據遊擊王牧民
報巴頌營部夷伯猪顧稟稱曾于奴酋寨親

見虎敦兔憨差部夷三金榜什等十名與奴
兒哈赤講說憨娶了金台什的孫女爲妻你
如何將他酋寨克去殺了他全家可將人畜
活的送還原寨死的再講奴兒不理口出妄
言等情往者臣同官張廷登臺臣王象恒撫
臣周永春暨臣俱有用虜之說今虎酋旣情
關于姻好復忿深于謾罵因其釁而挑之我
固不借其兵力以掃穴犁庭而第使釁開難
合用我之間伐彼之交不令其折入于奴以

助鴟張豕突之害亦羈縻急務也臣至廣寧
撫臣周永春示以用夷大略其授意于王牧
民者隨事相機曲盡方略矣時以仲冬苦寒
虎酋拔帳遠去無因遣使以借彼爲援恐要
挾無已未敢草草隨據永平薊州三道并東
西將領報稱界領口有虎敦兔憨差人講賞
如有不從要報先世捧捶崖舊仇比將官與
之講折諸夷使稱回去說與憨知着他幹件
功勞再來講賞等情又報虎酋差夷使于奴

兒哈赤講說遼東是他乞賞地方近被侵奪
又將宰賽金台什人馬殺害亦要報仇等語
臣與撫臣周永春議此中不便遣使既今虎
酋遣人講賞因其來而激之亦是一便遂同
遣官會督臣文球督臣之意屬道臣圖之永
平道臣袁應泰明心練識慷慨任事謂

明旨訪問非第資口角于諸夷也彼可以使來我
何不可以使往西域之詔三巴之檄豈不脛
而走者職遂議遣東官王猷涉歷虜地初至

腦毛大營再至虎酋母營後至憨營始言訪
問繼而挑以北關報仇之意虎酋款贈頗厚
隨遣夷使恰傍什等同來回覆且請示下出
兵殺奴等情該督經撫按諸臣與臣議之使
虎酋出兵有三難焉夷性叵測片語難憑口
血之盟更變可慮其難一諭令出兵必求重
犒物力未備難滿要求其難二虜攻其西我
攻其東犄之角之方克有濟如聽彼獨力正
慮勝敗未分勝則虜專其功敗則我共其害

其難三不如終以訪問爲詞北關子姓部落
俘擄無存議以朝廷優恤之恩波及其女而
雪耻報仇聽自爲計名義甚正恩好亦孚似
爲得策遂與永平道臣酌定論帖內開東協
副總兵官姜弼諭朶毛大知悉前日遣官訪
問金台什苗裔要優恤賞賚他今來回話台
什止有二女一爲你慙妻一爲你孩嬭再無
別人甚可憐憫你慙又差恰榜什及把兔兒
恰等說要出兵殺滅奴酋報效朝廷各位大
師甚喜你慙十分忠順賊奴悖逆已極天所
必誅但奴酋狡詐百端若要勦滅他必須萬
全你慙仍自作商量你們如恨奴無禮萬分
把慙放不在心上你們氣惱不過實心爲
天朝報效先傳諭抄花各部落休聽賊奴哄嚇
待

天朝大兵進勦時候兩下夾攻你們若殺了奴
酋首級賞銀一萬兩殺奴酋頭目及李永芳
首級每顆賞銀三千兩殺奴酋部落首級照

裡邊每顆賞銀五十兩仍將奴酋賞

勅給予金台什旣無遺下別人大師議將優恤他
特恩卽分賞他二女爲你憨妻的賞銀三千兩爲
你孩婦的賞銀一千兩可差在領賞處所赴
領後不爲例已于三月十四日永平道臣復
差聽用官張洪觀等四員伴送各夷回巢往
諭去訖所不敢先奏後遣恐一經奏聞事體
重大如我之垂餌非厚虜之戀棧未濃承領
不前恐傷國體今所議者波及也非特頒也
議與也非請給也止云出于諸臣之議不妨
事在行止之間且相機業有

明旨罔金許以便宜祈

聖明不以爲罪也隨據管鎮靜堡都司劉世勛稟
據守堡王世爵稟稱有西夷虎敦兔憨差貴
英哈必力等百十餘名到關審得來夷稟稱
前有關西界嶺口通事說優恤金台什二孫
女係憨妻并雙阿兒寨妻共銀四千兩于原
賞處候領今憨差我們來領賞物有黃台吉

等衆頭腦後邊來還有事稟等情該臣卽差東協標下中軍官曹應登馳至鎮靜堡帖諭正安堡遊擊王牧民夷使來款之宜稍加厚他不必挑激他用兵只把朝廷大恩北關忠順陷沒尚眷眷不忘命加優恤故波及于爾使知感激如朶毛大黃台吉來講用兵事宜說旣作一家便當與商斟酌出兵不宜草草待我兵大舉相約東西夾攻方好成得大功賞格自在目前只教他連合抄煖諸部切莫聽奴誘騙爲奴所使更爲奴所害也只如此說不必支離遣來中軍凡事與同心計議賞銀四千兩已行文管糧馬同知卽差官領給有何說話速速稟報去後今據援遼守備蔣紹芳稟稱蒙遼東巡撫周委往鎮靜堡撫賞同薊鎮東協差官曹守備分巡道委官張養光張登第公同該堡劉都司與憨差夷貴英恰等講說朝廷念金台什忠順有年今被奴酋壞了遍查各部落並無台什後代止有憨

妻與雙阿兒寨妻係金台什孫女故特優恤
此銀與憨妻三千兩雙阿兒寨妻一千兩以
示朝廷優恤忠順至意並不與憨夷等相干
你若立照畫押後不爲例我方交銀與你拿
去各夷初欲長乞後與再三講折貴英恰等
遂立文書三紙內言後不爲例卑職始將前
銀交與貴英恰收訖又據東協標下中軍曹
應登稟稱本月二十二日到遼東鎮靜堡有
虎憨部下通夷貴英恰等正石堡外放馬登
與講折停妥將所議銀四千兩分給具有領
狀開稱四十八年四月二十二日領過裏邊
皇爺原爲優恤金台什二女一個係憨妻中根兒
哈與銀三千兩一個係雙阿兒寨妻速不他
哈與銀一千兩只爲金台什忠順

特恩優恤金台什遺下二女共銀四千兩今同衆
夷使貴英恰等領過後不爲例不長乞公同
援遼守備蔣紹芳分給各夷親說多蒙

皇爺天地洪恩我們感戴不盡比有在堡宰蹇等

部夷在傍聞知都說金台什忠順裏邊

皇爺這樣厚賞我們各家都要忠順學好等語又據劉世勛稟稱公同曹應登會通事張禮同宣諭這四千兩銀是我們

皇爺原爲金台什忠順因他無子孫止有二女皆特恩賞他你們不可當常例你看奴酋背逆我們召到無萬的兵馬奴酋眼前死無葬身你們各夷眼看着樣子何不學做忠順好人各夷寫立領狀註寫後不爲例執照將銀兌訖等

情又據遊擊王牧民呈據相同到臣夫四千金之費非濃羶也虜且如期而來受餌而往聖上優恤之仁深戢于虎酋傳聞于諸夷豈不矍然動念感中國之有恩耶何必與言助兵之事第使不爲奴用我已操其用矣如牖毛大遲日果來別有商略撫臣周永春深知夷虜之情殊有駕馭之法斟酌運用必有嘉猷以收全局此臣所謂借訪問之名以行羈縻之術也得力革見在奴營聞奴賊以女妻之人

稱其虓勇不倫豈以妻而忘殺父之仇如破
奴之後歸順如初當另議處置至金白二酋
應立廟示勸臣已具在別疏

上聞又南北二關并稱忠順并爲陷歿如南關之
裔王世忠見在廣寧爲遊擊臣見之挺然少
年也容止大有華風肝膽盡饒英略宿抱黍
離之恨必堅傾葵之心應與陞授實職使風
示外夷以爲慕義之勸又欽奉
勅書以朝鮮效順欲加鼓舞第遣官

宣諭并撥兵防守揆屬國之情皆所不愿則惟有
厚賚以加之使自爲守備作我藩屏在我鎮
江等處如臣題議別爲防守之策庶朝鮮得
勢相倚有所恃而無恐矣統惟

聖明省覽施行

○考選湖廣道試御史林一柱題爲時事日非民
生日蹙敬陳六逆五盡二反一順以祈

聖鑒事臣需次言官

俞旨無日不當言

聖躬需調充耳爲戒不可言而三月旅邸觸事興
懷覺有感慨而欲言者不能無說而處于此
敢于給假時謬言之

皇上試謬聽焉臣謂六逆者何也以倣臣工也臣
見今日一二臣工所以責備我

皇上者甚悉而未有責備之實故責難于君曰恭
曰敬臣姑轉其言曰逆知逆則知恭矣知敬
矣夫將請臨御也何以道去邀留便作杜門
之套昔疾今愈故示不病之呻也夫將請發
帑也何以自公退食殊有愧於素絲入闥排
闥未忘情于吝惜也夫將請用人也何以循
例補牘高下畢竟在心置膝墜淵升沉終須
應手也夫將請宵旰也何以朱屏夕掩綠蟻
浮沉于清宵高門旦開與馬驅馳于白晝也
夫將請剖斷也何以東西南北隱隱據其中
央瞻顧徘徊着着歸于體面也夫將祈聽受
也何以是非同異未忘一室之爭面目肝腸
尚作兩邊之見也故以休沐請臨御逆也以

點染請發帑逆也以播弄請用人逆也以酣
逸請宵旰逆也以模稜祈剖斷逆也以褊執
祈聽受逆也此所謂六逆也幽無以盟天地
而泣鬼神顯無以信中涓而服巨室叩請雖
殷臣見臣下之不能得

皇上也臣謂五盡者何也以蘇民命也天下調兵
措餉固宜波及民間然漢武撻伐匈奴至空
虛海內自權鹽算商鬻爵外他無奇舉竊怪
今日用兵則以言利者太析也款目瑣屑未
易更僕聊試舉其一二如查稅契權當舖行
抽扣索捐助最甚者則在加派一加之不已
再加之再之不已三加之重徵之檄前方到
而後已隨道路洶洶將無偶沙中之語銅墨
之夫陽爲公而陰爲私追呼疊疊得無斃杖
下之魂且夫加派民也稅契亦民紙上阡陌
政田間隴畝等盡也稅契民也當舖亦民貧
艱舉火猶富苦割肥等盡也當舖民也抽扣
亦民在官祿薄則漁獵計工等盡也抽扣民

也捐助亦民有司筐篚皆間左篋筥等盡也
朝四暮三獨不念天地有數水輪陸運亦可
知神鬼無功此所謂五盡也有此五盡是生
二反曹致廉請括江南富民與權當舖也無
以異而括富民則以爲非權當舖則以爲是
一反也李一忠請調各府餘銀與索捐助也
無以異而調餘銀則以爲非索捐助則以爲
是二反也奸徒望風小人善意彼見在位之
多謀不覺熱中而欲炙尤而效之抑又甚耳

既知彼着非是便知我着是非而振之則在
皇上矣夫臣君之臣也民君之民也臣不敢多求
皇上候

玉體清豫之時求

皇上一臨朝是日也節逆耳之箴輟苦口之詞道
盛美以暢性情陳禮樂以悞觀聽一人愷懌
萬象昭蘇事自治民自安以清六逆以回五
盡以消二反當在可知不可知之中臣所謂
一順百順者此也嗚呼一順不可幾于上六

逆未遽更于下五盡銷閭閻之膏二反啓奸
民之志如此措餉真堪痛哭臣請竟言之夫
加派新額也諸項款目新例也舊者獨有成
式新者有何稽查多一番名色定多一番騷
動而多一件頭緒定多一件乾沒令民以爲
有官以爲無官以爲有部以爲無部以爲有
遼以爲無遼竟不知實入若干實出若干而
巧設多端詠求四出獻膚剝髓之謀半入烏
有無是之手黔首固易籠絡毛皮何堪同盡
可爲痛哭流涕長太息也臣以爲加派可免
則免加派不可免又不如併裁諸款而獨行
加派而稅契與當舖猶然田亦契契亦田田
已再加三加契復查冊對明久席遺業者有
冊無契則索契窮也未經過割者有契無冊
則對冊窮也使棍徒乘機而首匿契殷實之
家爲魚肉矣差役承票而查漏冊山澤之叟
無寧居矣至當舖籍官府而窩賊物盜賊不
充斥乎倍利息而厚償窮民不至枯乎故二

項之併裁尤急也抑臣又有說焉奴酋旦夕就殲加派應有期限假令懾于經略之望此不往而彼不來潛作老我之期明欲進而陰欲卻搗巢有待結局尚寬而年年此餉此兵事事待補待湊是自敗之術也臣竊謂經略索兵十八萬而半年內外天下何曾以十八萬應經略何待十八萬守遼陽度今日之勢與經略之才兵之不得取盈與不必取盈也亦可見乎前事矣何不將彭元錦等兵徑絕其來蹙額不前如州縣未至等兵勿責其調明白截住量兵就餉勿強餉就兵令我得持久以待奴奴不得迭出而肆我不亦可乎是在當事者酌而行之耳

○經略熊廷弼題爲遼左將帥同盟文武和附爲滅賊一大機會獨惜兵寡糧匱各道缺人不得隨心應手得當圖報以紓顧憂事職以短闇之才荷艱重之任當殘破之餘晝夜拮据獨賴督撫閱按諸臣同心匡扶部道鎮將諸

臣協力幹辦得藉手東支西吾徼殘鎮旬月
之安而苟幸無罪此非職之能而文武諸臣
和附之力也職趨公事實急而至其解煩苛
而就簡易則職又似緩職治貪懦實嚴而至
其忘過記功不留悃忿而没人善勞則職又
似寬職持大體實一無假借而至其晏處商
量之會去套數而存真率披肝膽而略形骸
使人人厭意而去則職又似有情禮雖將官
以下舊無待坐之例而職亦時時與共起居
飲食至親爲割鮮酌醴以相慰勞以此文武
將吏無不忘其急忘其嚴忘其顛倒嫚罵而
私相歎謂可與從遊共功名者莫職若也于
是總兵與總兵盟將官與將官盟皆宰牛歃
血誓同殺賊以無負朝廷無負微職爲約而
職亦私察其衆心和附可用也於是乃敢主
張守瀋以爲南顧遼海北規開鐵東逼賊巢
漸進轉蹙之計不然而瀋距賊巢僅百里耳
職亦安敢親統三萬不和之衆強置之虎狼

之側而自委其身于不測耶潘城大而低身
高不盈丈餘面窄僅五六尺其甃皆鱗蝕珊
塌可蹬而上其居民皆竄往他衛而城內僅
存三四百家皆開鐵流寓其本城遊擊併汎
懿蒲三備禦皆日集城內夜潛關外遇急則
各取趨避而去名雖未棄實已久棄職思開
鐵失而地仍吾土也今皆爲東西虜牧場而
我兵遂無敢北往者若賊再取所棄而夷毀
之南顧北規東逼之路從此遂絕故不得不
趨此人心和附而亟先據之以綴賊困賊而
使賊不敢他出一步壕墻逼城數尺許今填
壕平墻展開八丈作圍城一大營盤每丈五
地置戰車一輛中空衛以砲手十餘人餘寬
三四丈爲遊兵策應馬道盤外浚深壕二道
壕外合抱大樹多枝枒者交互糾結三五層
爲鹿角狀職同道鎮時時操鍤執杵以示先
勞而官軍無不鼓舞趨事若忘其苦者此亦
人心和附之驗也倘趨此將帥同盟上下感

奮有兵以供職調遣有餉以供職食用有道
臣以供職任使俾得隨心應手乘機進會以
惟職之所欲爲何遽憂逆賊不滅而

聖懷不釋哉無奈催兵而兵不得間有至者皆烏
合之衆徒取克數而不可戰也催餉而餉不
得本色見堆蓋套數萬石屢經牌催官催親
詣海州面催而趲運不前也折色部發愆期
朝短暮久而官軍盼望不得領也催道臣而
道臣不得廣寧金復兩道今尚未抵任也遼
陽開原兩道皆缺至四個月不補而贛畫自
正月回籍無一字相聞議改監軍道而亦未
改也每奉

明旨屢爲兵餉責成戶兵兩部及各省撫諸臣何
等嚴切而至其責成遼鎮每云着經略督撫
鎮道等官竭力防禦務保無虞乃兵餉之遲
悞如故各道之缺人如故職等卽欲竭力防
禦而憑誰防禦可保無虞是悞遼東事者在
缺餉在缺道臣而非地方官之過也卽微職

一段和韓文武之深衷將帥一段盟誓殺賊之壯氣亦空村之遼水東耳伏乞

嚴勅各部速處兵餉速補道臣以供職用而毋徒令職坐失機會也况潘不守則遼不重賊不困語云不探虎穴安得虎子業已統兵往守偏處虎穴而苟不得多兵爲之策應多餉爲之接濟道臣駐劄一員爲之殫壓又不如將各總兵將官人馬坐食遼陽聽遼東之日削日蹙自消自盡之爲緩而遲也如戶兵兩部不爲職速兵處餉

皇上不爲職速補道臣更乞

明旨諭職撤回三帥人馬專守遼陽毋孤注于潘以自速不測之禍職愚幸甚殘遼幸甚

○山西道御史馮嘉會題爲時變需人至急

聖意持之益緩伏乞亟斥游詞俯採忠言以去危圖安事昔蘇軾對仁宗曰天下無事則公卿之言輕于鴻毛天下有事則匹夫之言重于太山非智有所不能而明有所不察緩急之

勢異也今天下亂形已成潰決指日而奴酋
時聞結連西虜禍且叵測海內徵兵加賦財
盡民窮所在思亂中外臣工咸矢憂危苦詞
進持顛過計以爲目前救急之著無過于下
枚卜點豕卿大僚用言官三事而

皇上不惟不信且漠然置之罔聞輔臣言之不聽
銓臣言之不聽各衙門言之不聽豈誤認三
事爲若急若緩舉大小臣工言真不足動

聖心之聽耶抑紐于遼東警報頻煩玩之爲不足
憂雖明知三事爲目前急務故緩視之而執
無變耶職請以可憂不可恃之實爲中外臣
民所通曉公慮者一一爲我

皇上直陳之其一遠憂遼左兵食不繼危在旦夕
自去年樞部徵兵戶部加餉軍需并苦難敷
戰守尚無成議倘如近報奴酋果與巴領打
漢等夷合兵分犯將遼廣不靖山海薊門以
次震搖都城不攻自亂矣是時不有仁賢憑
誰捍禦此其可憂者一又近之而憂宣雲三

衛導酋內犯職料奴酋卽乘勝東馳山海天
險卒難頓越惟是炒煖滿明一帶諸虜密邇
邊疆每每乘機虛喝要賞奴酋蓄謀最狡用
兵如神儻其通謀炒煖滿明捷取關山西北
不三日可由山後直抵都門是時卽欲用賢
畫策嗟亦何及此其可憂者二近而又憂內
地民情瓦解白派車牛令行三輔之民業已
不堪驛騷而地畝加派又至再至三尚不知
足于何日停在何年民憤勃洶莫必其命兼

以都門畿內白蓮龍天等教賊徒把棍結黨
成羣人人幸災樂禍儻乘夷虜縱橫因勢而
起漢末赤眉黃巾之亂誰與消弭此其可憂
者三又近之而憂都城姦細防檢難周此中
五方之人湊處奴酋必預置間諜以探我虛
實報我機密如去年蓋州套盤獲夷丁于纏
袋內搜出胡自首供係建酋遣來探信運到
米豆數目及運官姓名意在攘取益見酋謀
深慮遠內地所遣間諜實繁有徒儻伺夷虜

臨城必然乘機內應于時卽援兵四集而居中無人運籌內外奚憑策應此其可憂者四夫此四憂者遠之不踰時月近之只在眉睫人人知之人人慮之豈以

皇上英明天縱反慮不及此哉或者近習昧于安危大計圖獻諛容身不以為奴賊遠難至邦畿則以為庚戌至城墉數日退去以言寬慰聖心卽由此以稽留用舍如果有此說我

皇上試反詰之以若所言爾能保奴酋終鷙伏不犯遼陽山海乎能使宣雲三衛不為奴酋鄉導不由山海直抵都下乎再保內地民情不窮極生亂震驚畿輔乎再保奴酋姦細不乘夷虜躍入內應乎切恐若輩必不敢謾應居恒貢諛之情自彰而所謂四事之可憂者我皇上尚肯漫然不以為意耶既知憂其所可憂必思用人以圖濟則夫大小臣工所言閣臣冢卿大僚與夫俞用言官又何可緩也今宰臣孤立于巖廊久乏協恭之誼大僚落落若晨

星尤切曠官之嗟言官收用于題差渺無同
升之路但得

皇心愉悅卽爲諸臣向用之機

聖筆一舉便是振鷺盈廷之日行見廟堂頓生精
采而中外可憂可圖諸狀自不患于經理無
人尚何慮夷虜奸宄之突發哉

○原任廣西把總李自用題爲敷陳末見以殄醜
虜以復封疆事奴酋包藏禍心蓋起于滅王
杲時不并戮之之故也所可恨者李永芳悖

叛約虜破城以快其欲佟李二姓兩家宗族
相親屯堡鎮城處處有之其他者怨堡官之
剝削貪奴酋之重利陰而逆款以致各城堡
之失易如反掌不知者坐罪于將帥推諉于
無軍而不知城之破非戰之罪兵之寡也緣
內應者出于不測以致城破人亡間有知者
心懷縮胸而不敢言况三路喪師之後人心
戰慄卒無堅志誠不知戰之日杜松受奸細
之誘劉綎遭回營之變然皆將帥不精微不

嘗戒故皆墮其術中兼且遼民多詐士風薄
惡樂爲異說以損人功好施詭計以遂所仇
上之人不覺而信之將士俛首喪氣是以上
下解體開鐵之失全由于士卒顛倒將佐眩
惑使其主客兵彼此和睦内外交傲未有如
今日也幸奴酋無遠略雖一時招亡納叛以
壯其威然地僻人衆糧食不給鹽菜艱辛勢
不得不搶奪以度朝夕况李永芳佟養性輩
愚而好利賤而寡謀不過飽慾爲上策若使

其與天下急衡當承平日久民不知兵遼東
將佐悉皆驕怠使其尅撫順而長驅孰能禦
之又幸奴酋殘忍酷虐破一城屠一城天必
厭之滅亡可待况夷性貪吝疑詐不敢遠離
巢穴其志願技量可知已兵馬雖有十萬多
半皆中華人爲之前驅示城堡之相識者以
候内變非其鋒不可當吾兵自弱之故也往
年東西虜乘虛犯搶動輒數萬各城堡破之
不過數千我之兵強于夷狄多矣今國家士

馬非宋之弱國家糧餉非漢之竭彈丸黑子
之奴酋何異于瘡瘍疥癬而顧敵之之難也
柰何將非其人兵以烏合焉能制勝于夷狄
乎當事之經略撫按嘔心吐血不得一妥然
經略撫按不過節制總大綱而已戰守攻圍
之法奇正分合之妙敵之虛實兵之強弱悉
由于將今之大將偏裨不若舉動之間自家
掣肘盡倚之經略撫按事可乘也卽行稟令
動輒十餘日而便宜失矣何以制勝臣以爲
將必得其人而寄之以權然後效有所歸也
臣今籌畫二十款爲

皇上陳之

一曰理門戶以固堂奧鎮靜威遠鎮北關之門
戶靜安松山廣順關之門戶慶雲古城新安
關之門戶而開鐵總其要開鐵破靖安松山
已不能爲奴酋之遏慶雲古城何以鎖鑰西
虜是開鐵宜急復以拒兩夷之訐今日城墉
空虛人民亡散似無足守然以兵馬萬人載

餉浮駐于兩城克復臨關諸堡俾聲勢聯絡探候慎密外有必戰之勇內無家室之慮藏無餘財野無自牧擄殘已過不復垂涎我于是地得以勤教練謹覘候東警伺所向以攝其後西警探所往以遏其鋒故開鐵不可不早恢復三關不可不早葺理也會安東州撫順關之門戶撫順城正當建夷貢市之路不期叛臣獻降以致丘墟奴酋不據地而守當時急于便地建立營寨置重兵以屯守且修

且戰復此一路要害叛夷亦不敢猖狂至于斯也柰何計不出此以致清河復遭屠洗令奴酋任意擄掠無所顧忌爲今之計選將練兵秣馬蓐食于此三四處屯守內以固瀋遼外以守門戶北復開鐵南顧寬靉瀋陽增兵居中策應沿邊緊要別立營寨以爲特角之威嚴防範慎烽火于以奪虜氣也何有此所謂門戶修而堂奧固也若守遼陽則瀋陽緊關之地以遮其前奉集堡威遠堡障其東北

虎皮驛居中策應由金復蓋間道而入則海
州當其冲而鞍山驛爲要地則沙河堡不可
不重也以西虜言之則靖遠堡長勝堡遮其
西北而長寧堡雙廟兒一槩要緊地數處按
伏得宜則遼可保無虞冰凍之日三岔河東
西兩堡宜增兵固守以防西虜侵犯此保遼
陽之大略耳

一曰收民兵以佐軍威人疇不愛親恤家上之
人能鼓舞之以從事較之烏合之衆不經訓
練者孰優也况遼民日與達虜稔熟慣于弓
馬氣習好鬪用之猶可以奏凱說者謂三路
喪敗數城被殘後精銳殺戮幾盡不知尚有
逃散于各城堡隱跡不見間有更名投充家
丁者若招之回尤可得數萬料遼之民居于
鄉村城堡者不下數百萬長于弓馬者少壯
膂力過人足以格鬪者亦不止一二十萬以
文墨招募之鮮有應者有應召者皆市井無
籍之徒希一時安家月糧爲資賭口食之需

臨敵先奔胡能禁戢時或流言搖盪軍心奸
酋亦乘機應募爲尅城內應之助所以諸城
寅至卯破乃招軍而來禍也欲集民兵先揭
示鄉村城堡告以害患之必至與其束手待
斃孰若死中求生以保家室以衛地方在衆
姓亦思利害切身急于本鄉村屯堡自擇一
素爲人所敬服者爲之長選各家之少壯子
弟長于弓馬者爲一等膂力過人善于冲擊
者爲一等善識夷語巧于進退者爲一等務
必每戶三抽一五抽二公道選擇不生嫉怨
其爲長者率此三等之民歸之行伍以聽指
揮隨管教以坐作進退之法不尚一月可稱
精兵有功者一體陞賞率兵之長若有數及
千名者職以千總數及三百名者授以百總
總旗旗牌之屬賞罰無偏錢糧不二民自憤
激若差官僉點賣富役貧種種奸生民亦不
願聽募矣必如法僉點奸細可却責成可稽
人難規避舍民兵不集而必于調四方之兵

非惟救近火難于待遠水烏合之衆不足以當梟鴛之虜且所至之兵非慣于行陣者見虜先北鮮不敗事所統之官非士卒所相識焉能奏功臣故以爲足糧糗厚賞賜選遼之子弟充實營伍教練客兵以爲防守激勵其氣虜不難于破耶

一曰慎烽埃以固邊圉東西邊境崎嶇長二千餘里惜乎無墻可依各堡所管墩臺雖有多寡遠近之殊使各堡官能計里巡察早夜提備賊由何道而入歟卒有侵犯畫則旗砲夜則火砲頃刻千里何援不至遼之臺軍偷惰燕安賊之來去漠然不知時或知之亦俟其去而後舉烟放砲從容馳報移已作酉擄去云少以欺上官積習成套無所查覈以致憤事軍則安而將招尤姑以東虜之邊計之自鎮北堡以至奴寨通計邊長八百六十五里墩臺二百七十七座爲堡二十五所惟孤山新堡酒馬吉堡與靉陽各六十里邊長墩少

空地頗多其餘者夜不收晝夜巡防烽火不失兵集咫尺奴酋豈敢輕犯由軍不盡役官不稱職是以叛酋公然出入如履無人之境爲今革故鼎新沙懦汰疲察違玩失事立斬不赦庶幾可耳

一曰營地利以修防禦城堡墩臺俱有險夷將士寧不知之緣弛縱成風漫不加意來不禦去不追以致頽靡莫振豈地里有不利而救援不及歟如靖安撫安柴河三岔兒等堡山勢峻險道路窄狹多謂地險不通火舉防守稍疎賊得踰險而入開鐵卒遭其毒如松山境外缸窰石門東夷入犯多由此奔李毛頭東安堡等處撫按境外蟒山離邊七十里建酋住種之處其所居則甯公塔也向西北行至顧官兒山嘴則犯三岔兒堡東南行至土木河則犯撫順由鬆髻山奔古路中墩板山小墩則犯本堡矣在撫順境外官兒山與土木河相去不遠西北行從韭菜園鬆髻山犯

會安地方則鄧良堡可以伏兵如犯本堡則
由新添小墩雙古路墩而入迤西則可深至
陳玉堡萬瑞屯等處而塔灣屯可以堵截東
州堡外鱸河離邊五十里瞭角山離邊二十
里建夷諸夷每此糾合過河往北至撫順所
地方往南犯馬根單地方犯本堡由塔山小
墩而入迤西深入則可至徐勝堡金安屯等
處馬根單外有八家兒離邊三十里諸夷往
南至紅崖則犯散羊峪再往南會合諸夷則
犯清河如犯本堡從石門子奔清寧小墩靖
安堡而入如深入則至挑捨谷爛木冲等處
散羊峪境外峪石頭至松樹頭而入若從牛
心山向化嶺鎮夷墩等處則犯清河往北則
犯馬根單犯本堡由挑捨谷大梨樹奔靜寧
墩而入則板長谷可以伏兵清河堡境外松
樹口離邊七十里往北由散羊峪紅崖子則
犯馬根單往南由王八崗則犯一堵牆如犯
本堡從牛心山向化嶺來迤西深入劉景等

屯迤南深入高千戶莊播利谷等處一堵牆
外王八崗代子河大夾河等處離邊遠近不
同往北至松樹口則犯清河地方往南至先
山則犯謙場堡地方犯本堡從梁子嶺奔代
子河夾河山墩虎牢墩而進迤西深入許家
背大谷口張能谷能地謙場堡境外光頭刺
子離子離邊二十里打速谷離邊三十里撇
梁一百餘里夷往南孤山牡丹寨至涓兒渚
則犯靉陽地方往北至王八崗則犯一堵牆
如犯本堡由打速谷瓦子谷奔官家峪等處
入松山新堡境外張其谷刺田子賊往從光
頭刺子則犯謙場堡地方往南至涓兒渚則
犯靉陽地方犯本堡從大金口奔矮嶺埋達
谷而入若掠灰窖谷則大帳裡可以伏兵洒
馬吉堡境外大金口離邊七十里乃賊入犯
會兵之處往北至偏牆則犯狐山地方往南
則犯靉陽地方犯本堡從大柞子河奔乃木
定等處而入若犯尖順兒等屯則石頭屯可

以堵截髮陽境外清水谷北山等處離邊八
十里向西北行至牡丹寨則犯棘場堡西向
南行至十岔口則犯新安而馬尾窩坡可以
伏兵新奠境外涓兒渟北山等處離邊二十
里往北山等處則犯康家哨地方二道河可
以伏兵往涓兒渟則犯松子溝奔松山嶺墩
石河墩瓦子廟等處而矮子嶺可以堵截寬
奠境外松子嶺乾灘子等處離邊三十里若
從乾灘兒迤西進則犯檀木冲深至大奠永
奠等處大奠境外檀木冲離邊四十里永奠
境外青岩子文大人營等處離邊五十里長
奠境外短錯江離邊二十里與永奠青巖子
相連江臺堡境外十岔口原爲極衝總路今
兵大逞必由此處因有寬長永奠等堡聯絡
備禦故覺少緩然亦緊要地豈可因緩而弛
防使各將佐熟于此擇利堵截一見煙火預
伏要地以擊之一創之後奚敢深入以上地
境彼可以來此可以往若欲勦之乘便而入

復得鄉導開示迂直之境何奴酋不滅也
一曰防奸細以遏敵情奴酋逆叛首殘撫順除
佟李之外皆無噍類次克清河咸被虜劉撫
安諸堡剪艾待盡開鐵之慘又有甚焉遼東
二十五衛士民之親戚故舊鮮不折居于所
殘之城堡受其荼毒宜乎裂背碎齒食其肉
寢其皮以雪不共戴天之仇顧乃樂爲虜用
藏賊于家以爲內應輸情于虜以邀重利或
張賊威恐嚇吾民或訛言誹謗將佐或稱回
鄉借親作奸或使遁逃毋冒鋒鏑或告搶期
班地難守種種奸弊不能枚舉此皆佟李二
姓扇禍以致人情畏悚怯敵之心生戰守之
膽落所以諸城應手而克者坐此弊也宜行
保甲法則奸宄無所容至于寺院最難考究
削髮與虜等且僧道貪利忘義喜于作奸人
敬神佛忘其爲奸所以細作得藉憑而誘我
之虛實但禁遊食者不許入境住持者不許
逃遊犯者重以刑且佟李二賊事覺之日卽

請

命族誅之亦無地方覆殘關防若此之疎也仍不
錮之于獄令其親戚枝延蔓引轉相為奸諸
城堡破不頃刻奸細在內應之其為奸賊藏
虜非佟氏乎使誅戮既盡虜則絕望人知悚
惕遠近城堡庶可策勵而守也又聞虜之所
缺者鹽醬必仰給中國貿易禁之不通三月
之內虜必自亂遼民貪其重利日與金復蓋
州車數百輛羸數百匹晝夜運鹽聲言各堡
興販其實假道出墻而鹽行經紀則奴酋家
之佟伍也久投官府門墻以遮其奸至今竟
無覺者非惟假此以通我之情挾帶猾虜潛
藏四境以為彼之應三公河嚴守往來而不
知柳河周劉諸姓夜渡逃軍及其奸細不為
禁止其禍可虞破其營為此不得輸我之情
彼不得邀我之有奸細之民入無寄身出有
盤詰自是兩絕而邊境可得而寧矣

一曰重將權以帥偏裨夫將者國之輔軍之幹

也宜重權毋掣其肘大將亦得展其所長蓋
權在將則士卒不敢違悞偏裨不敢玩忽調
遣不致遲延將無權則士不任將無成則士
不敬無權無威何以統衆而馭下又聞遼之
偏裨事之緩急小大不稟主將竟爾越呈卽
州縣之不由府道之意天下府縣不敢越稟
軍中偏裨進退生死悉係于將公然藐之而
不顧何事于將此九邊所希聞者而遼則有
之然則將權可不重歟

一曰申號令以肅戰守號令明則人心恐懼人
知恐懼則戰守攻圍惟命令之是聽奮勇直
前之氣不待賈之自倍矣今之士馬孰不曰
教場日逐操演其實應故事以塞一日之責
見敵則戰慄而欲奔其弊在將佐不知操縱
闔關所以士卒離亂而莫整必得一練達之
將統帥三軍教以進退坐作之法鬪戰攻擊
之旨金鼓旌旗之節奇正分合之妙一操一
縱三令五申務使閑熟失伍者罪後期者誅

左右應麾前後齊止勇者不得獨進怯者不
得獨退法紀清明號令整肅三軍畏主而不
畏敵庶幾可用不然雖多亦奚以爲

一曰信賞罰以明法紀賞以存勸罰以示懲賞
不避親罰不避仇所以明至公也邇來主兵
多事姑息不偏于賞則偏于罰何以服人心
惟開誠心布公道賞一人而千萬人悅則賞
之罰一人而千萬人懼則罰之刑上究賞下
及孫武斬二姬而軍法立穰苴斬莊賈而威
令行韓信戮英蓋而三軍肅楊素殺血盈前
而衆不叛蓋恩威並著以致然也帥三軍在
于慎賞罰矣

一曰操權術以勵士氣古人所以使功使過使
貪使愚棄所短用所長動而勝人成功出于
衆者操此術也今之在下位者或扼于時阻
于勢隔于科目拘于資格皓首林泉若能破
格招致推誠委用頗牧在肘腋矣臣故以爲
勵士之法領三級之功賞十三等之取材誘

掖而獎勸之比試賞功能者位庭中予賜厚
其次位上階賞賚平而其劣者位下階薄以
示罰如是則人心奮而氣倍而功建此古人
論功行賞之法取士之等有精于騎射者有
長于神器者有踰高絕險輕足善走者有膂
力過人善于搏擊者有超絕江河溯水分波
者有世臣失位而欲復見功業者有有功見
訕而欲申忿者有過失之人欲逃其恥者有
戰敗之士欲立功以逃其死者有雞鳴狗盜
之雄行間奪塞者有高談濶論強辯飭非堪
充使命者有胥隸賤役欲建功以揚名者有
死事之家而欲復仇報怨者十三等之中加
以激勵之方人人賈勇所向無敵矣

一曰行間謀以携黨與孫子曰用真大于間事
莫密于間故間有五等三軍所恃而動今日
奴酋反知用謀不斬金寶凡我之情形緩急
兵之衆寡將之優劣勢之強弱靡不周知而
虜之動靜毫無所聞豈華人不如夷耶由我

祖宗法制縝密上下牽制舉動之間非命不敢行
一經稟覆往返須十餘日非特妨事因此泄
事事泄則資敵而禍奇所以用兵貴詭用謀
貴密用將貴一則行無妨碍行間不計所費
漢高得倚于陳平惟間之神可以裂其腹心
惟間之妙可以殲厥渠魁考之諸夷諸夷誠
足以間者自靖安以至寬奠夷種不爲不多
雖爲逆首用非心服也况奴酋忌刻少恩多
疑同胞二弟且殺之况他族乎奴酋結怨諸
夷蓋亦有年今日從事非利誘則威脅到頭
終非好相識若馳一忠貞舌辯之士曉以禍
福啗以金帛許裂其地而畀之夷性貪而畏
威離而難合使之黨與一携鮮不如決隄之
韓魏也今之將帥宜從權假之便宜不計出
入不摯手足胡敵情之不得耶

一曰擇車馬以壯戎事法曰明知險易則地輕
馬芻秣以時則馬輕車高矚有餘則車輕人
鋒銳甲堅則人輕戰然則車馬可不重歟馬

之于軍如性命之相聯遼民好馳驟故多蓄
馬騎射外來之馬恐不服水草遼東寒甚他
方馬不經慣最難調理若搜索本地之馬尤
可充營伍良肥精騎多藏大姓佃戶家厚價
貨之強于外馬多矣大車環壘從來尚矣其
法以一人輓二人運用神器二人挾轆而戰
以防偏突其制有三等一爲鹿角車以鐵爲
之施于車前端隨車廣狹屈曲出于車前牌
之外以擋刀箭轆傍設戟以刺馬胞車中容
大砲一或風雷砲一快鎗六鳥銃三每車載
器行以一百二三十斤爲準重則難馳驅若速
征可便帶五人五日之糧進則禦敵居則爲
營退則殿後車上之砲三次更發其所立相
去八戶以便跳盪車之後立二馬爲遮前逐
北之用其二迤形車其制如虎豹獅象之蹲
踞足上安輪旁置攔楯以架刀鎗獸坐下一
砲口中消息吐火以帘幃之臨陣去帘馬見
虎兇而必奔口吐烟火人亦畏之虜奔則馬